

havia fato lassar li schiavi dil Soldan retenuti e tutti li navilii. *Item*, come si preparava armada de vele 18 in tutto per andar a' danni di corsari fuora di Streto, tra le qual sarano 10 galie, una barza, fuste etc.

210\* Da poi disnar, fo Consejo di X con la zonta, et preseno mandar Alvise di Piero secretario in Franza, qual fo quando fo fato la paxe con re Lodovico defunto, et li fo fato la commission; la causa dil mandar fo secretissima.

*Di Padoa, di rectori fo letere.* I nimici, *ut supra*.

A dì 8, fo letere di campo, di Castion di le Stajere, dil provedador Griti, di 6. Come francesi non si moveno, nè vol mandar li 3000 fanti; e scrive colouqui auti con monsignor di Lutrech. Il Governador è a Peschiera e le Cavalehasele con alcune zente nostre.

*Di Udene, di sier Bortolamio da Mosto provedador e viceluogotenente.* Come i nimici di Gradisca erano ussiti et venuti a Strasoldo, e brusà il loco et fato danni.

Da poi disnar, fo Pregadi et fo leto *letere di Napoli, di Lunardo Anselmi consolo nostro, di 21*. Come quelle lanze spagnole fo dito dieno venir in qua, si meteano in ordine etc.

*Di sier Zuan Paulo Gradenigo provedador general, date a Porto di Lignano a dì 7.* Dil zonzer li, dove con quelli capi ha fato consulto et terminato non poter obstar a i nimici, ussendo di Verona e venendo a quella volta, *unde* se tirerano a Este per segurtà *etiam* dil padoan etc. I nimici certissimo è ussiti di Verona e alozati a Porzil, ch'è mia . . . di Verona et . . . da Lignano.

Fo leto le letere scrite per Colegio, a di 6, in Franza e in campo.

Fu posto, per i Consieri, elezer *de present* uno savio dil Consejo in luogo de sier Andrea Griti procurator, è fuora provedador in campo, el qual el stagi fin el dito Griti tornerà; et tornato el sii, stagi tutto il suo tempo di mesi 6, *ut in parte*: 122, 18, 0.

E tolto il seurtinio numero 10, rimase sier Anzolo Trivixan, fo savio dil Consejo, el qual ave 133, 65 di no. Soto: sier Piero Lando el governador, 130, 77; poi sier Andrea Trivixan el cavalier provedador in Brexa, 108; sier Marco Minio, savio a terra ferma, 106; altri non passò. El qual sier Anzolo introe subito.

211 Fu posto, per li Savii, come quelli dil castel di Padoa è molto non fanno alcuna faction, il castello

sta senza guardie, le porte stano aperte, però sia preso che di fanti 32 sono, siano reduti 25 soto el strenuo Brazo Forte, e siano tutti forestieri e habitino in castello, e si tegni le porte serade, et non lassi intrar alcun senza licentia di rectori; e li fanti habbi lire 15 a raxon di page 8 a l'anno, che prima aveano lire 10, et Brazo predito debbi apresentar li fanti a li rectori, e loro li confirmano. Nè ditti fanti si possino partir fuora di Padoa, nè substituir in loco suo sotto pena de immediate privation e casation e restitution di danari havesseno tochati, e di quella corporal punition parerà a essi rectori; i qual dar non li debbi licentia. *Item*, dagino soldi 10 per uno contestabile predito per suo caposoldo: 144, 39.

Fu posto, per li Savii a terra ferma, atento le fidel operatione dil qu. Vigo da Perosa, fo contestabile nostro, el qual a Peschiera da i nimici fo ferito e fato preson e poi liberato morse e lassò uno fiol nominato Antoniazio; *item*, Piero da Brexa nominato el Pretel, el qual essendo in Brexa teniva pratica di dar una de le porte de la città, qual scoperto, fo squartadi i soi compagni e lui fuzite e la sua caxa fo sachizada, sicome testificha sier Polo Capelo el cavalier stato provedador in campo, e sier Daniel Dandolo fo provedador a Salò, però a tutti do sia dato provision ducati 8 per paga per uno a raxon di page 8 a l'anno, con questo servi con uno cavalo apresso sier Andrea Griti provedador in campo: 128, 24.

Fu posto, per li Savii, si trova in grande povertà Pontio Lusignano et Hironimo Cadit nobeli e cittadini cyprioti, le qual do fameje Lusignana e Cadit è antiquissime, et zà dil 1459 il qu. Antonio Cadit lassò ai Procuratori ducati 300 di le sue intrade da 211\* esser date *ad pias causas*: però sia preso che a li ditti sia concesso una di le provision di Cypro, l'è ducati 60 soliti darsi a' poveri cittadini, zoè le prime vacante, con ubligation di tenir un cavalo per uno: 117, 15, 9.

Fo tolto il seurtinio di far provedador a Vicenza e vicepodestà. Tolti numero 46, però che molti a le scale procurava, ma non fono balotadi per essere gran numero.

È da saper: in questi zorni vene in questa terra uno secretario dil re di Polana per tratar acordo con l'Imperador et la Signoria; *unde* per farli risposta, fo ordinato far oration per le chixie, e tratata questa materia nel Consejo di X con la zonta. Li fo risposto non *ad vota*, et partì non ben contento di la Signoria nostra. Vol, volendo far paxe, si lassi la diga con Franza.